

Egei Jemsha Nalama Nei

Tawale Tā

O Jems eme Yesuha e mala. Jems e dabai degedibe, damaleyodele i o sasai, sa Jerusalem tie kedia dia delei. Dia dalamou, ho o ilo kelege gofou dege walamou degele imou, damaleyodele i o kedia kama fosigemou, sa sa ilo ahudoya deleigui. Sa ahu ahudo keleya dalaguamou, Jemsha diamokou kuguo kou kuhe nalama nei.

Kuguo kumaha sibigebe kou gue, Yesukou damaleyodele i o sasai kediage midihō bolodonou milou goubasi, di diame damaleyodeidade tawale ile.

Kuguo Jems kumaha tā sibige tanou tanou olou feibe kuhe:
Tā Hiye 1:1-18

Di tefele duguba neledo dege dalaguababe, Godiha dibou de dogou guo dalaba suluguale.

Tā Hiye 1:19-5:6

Di Godikou damaledo-yodebabe, dibe midihō bolodone milou ga suluguale.

Tā Hiye 5:7-20

Di neledo dege dalali, Godikou diho baga tobolou ba, Hiye Oha haguale ke dia dalaguame.

**Di tefele duguba neledo dege dalaguababe,
Godiha dibou de dogou guo dalaba
suluguale.**

(Ta Hiye 1:1-18)

¹ Ame Jems, Godibou, Hiye O Yesu Kelesubou dilie dabai degedi o. Israel kedia huti olou fei 12 kege o sasai ilo kele, afu kama fosige, sa sa ahuya dalagua ke nimokou be age kuguo kou nalama neli kuhe. Agali bolofei.

Tefeleduguyeye di dedei sasagiedi

² Ma mogo diama, nimokou tefeleduguyehagubabe, keme hoho degedi midihonou dade tawama. ³ Ni Yesu Kelesukou damaleyodema dalamou be, tefeleduguhiyedo kou dugumou haguluye, kenou si ni damaleyodei keme neledodege dalagua kaha degemou, habagene ni kegenou dalaguale keme ni kou tewe. ⁴ Ni hagi duguoba neledodege dalababe, nime fi haguaba dalaguale. Godiha midihota tou degele mei. Ni midihobe bolodonou dalaguale.

O taha fimai tou degeibabe, Godikou nou diho baga tobou yedei

⁵ Ni o tae ta tawaiyo mei debabe, Godikou diho baga tobou ba, Godiha duloba namokou fimai boloke nele. Godibe gofou ta tobou di o mei. E nedibe hiyedo, o sasai dimokou fimai bolone di o. ⁶ Kenou si na Godikou damaleyodema diho baga tobou lababe, na fimai bolou degeba diho baga tobou da. O fimai bolou kegei keme to bobou, wiye mala ima haguama dedi sagai kenou tefei. ⁷ Name kegedi debabe, Godihage namokou bi ta nele meidade tawa. ⁸ Yobe, ni o tae fimai bolou dalalibe, ege midihosudo milou gadi kaha degemou.

Jemsha bi mei obou, bibou obou kediamokou egele tobou

⁹ Kelesukou damaleyodele i o sasai diama, ni bi mei kaha hoho dege. Godiha dihile kokou ni hube hiyedo daladade tawama. ¹⁰ Bibou o e hube Godiha huyafei degeibabe, e hoho degelenou. Yobe, bibou o eme e bimai kokou nou hoho dege dalali, hebeye fi degema, toto mei degedi sagai kenou tefele toto tolo ile. ¹¹ Di tewe, aso difi hiyedo degeimou be, hebe fi fafagalemou, mihikou duolugi mei degedi. Nebe kenou tefei, bibou oyege dabai hiyedo degemou iligi tolo.

Godiha dimokou midihō bolodo hehegiligibe, e di ta tefele dugudiyo mei

¹² O koyo na tefele dugu ke duguoba neledo dege dalababe, na hoho degelenou. Yobe, na neledo dege dalababe, fi bolodo, Godi you e tagadi o sasai kediamokou kou neleyodema dala ke malaba, tofousogo tofousogo tofolou. ¹³ Na tefele dugu ta dugubabe, keme Godiha a tefele duguluyode tobou da. Midihō kasagai taege Godibe ta tefele dugulo sagai meido. Haba Godihage o sasai ta tefele dugudiyo mei. ¹⁴ Di tefele dugudibe, diyou di fiye tagai kahanou, di midihō kasagai milou ga idi. ¹⁵ Sasaiye dihi guokou degema dalali, dihi kuhe mou di sagai kenou tefei, di midihō kasagai milou lamou be fimolugi, ise, midihō kasagai kuhe milou di. Kege milou mou iligi tolo idi.

¹⁶ Ma mogodo diama, niou tawaibou, ni midihō kasagai kegei kaha niou sie ogou gaiye. ¹⁷ Bi bolodo olou fei, sibigi dala mei keme Aye Godiha hebenitou ge dimokou nedi. Agudiletou hoho keme you milou kegenou dala kehe. Godibe taye sa degei mei. Tayebe sasado degema, tou

degema kegegadi. Godiḥa hebenitōu duwo keme kegediyo mei. ¹⁸ Godiḥa yōu tagaiya kenōu dimokōu fi geḥe ke neleyodemamōu, e ta damaledo kaha degeiye, dibe fi geḥe kebōu de dalagua kuḥe. Kegei degemōu, damaleyodei o sasai dibe yōu e dihi wolo ke sa degei. Yōu milōu gai ilo kelebe sisigo habage felegai ke sa degei.

Di Godikōu damaledo-yodebabe, dibe midiho bolodone milōu ga suluguale (Ta Hiye 1:19-5:6)

Di ta dulo seseme

¹⁹ Ma mogodo diama, ni a tobou ladi kou defeido tawama. Oe egei tobou ba defei toto duma. Kenou si nige toto ta sima tobou dama. Haba gofoune toto degedama.

²⁰ Yobe, o koyo na ta gofou dege tobolou ba, haba midiho ta milou babe, name Godiḥa dihiḥe kokou doudo ta milou yo mei. ²¹ Kegei degemōu, midiho kasagai, sibigi degedi keme ta degedama. Haba midiho kasagai olou fei, ni milou ga idi kene haba ta milou dama. Niou sie huyafei degeba, Godiḥa ta, e ni duledu segei dala keme defeido tolou ba sesema. Kege degeibasi, Godiḥa ni mamolou.

²² Godiḥa ta ni dumou haguei keme mou youwa dulo fogou dama. Ni duloba defeido sesema. Dulo sese ho fogou babe, niou sienou ogou gama fiyasigeiye. ²³ O taha Godiḥa ta ke mou dulo fogou babe, o keme yōu e midiho galaseya duguo fogou di sagai kenou tefeli. ²⁴ O kegei kamahage yōu e midihobe kagei dugu de ta tawadiyo mei, mou totou degemōu fogou di. ²⁵ Godiḥa ta bolofei keme

doūdo. Di kokoū damaleyodeibabe, dibe hebe kasagaī keme ta malā ile mei. O sasaī koyo nā, ta bolofeī ke defeidō dulo seseligi tawaleba, ta totoū dege ho fogoū babe, name Godihā dogoū guba, dabai degeba, hohō degele.

²⁶ O sasaī koyo nā noūsie ame egei dudi oyode koū toboloū ye, noūsie ne mogoū dia dala ho fogoū babe, name noūsienoū ogoū golu. O kegei keme Godihā ta dudi o mei. E egei dudiboū, e damaleyodeiboū keme sibige ta mei. ²⁷ Egei dudi midihō, di Aye Godi e tagalibe koū gue, gube dihiboū kuei sasaīboū kediā hagi degeibabe defeidō dogoū gumabeedei. Midihō keme Godihā dihile kokoū be bolodo. Haba tabe, sa sibige kuokoū midihō kasagaī miloū ga ho fogoū moū si, Godihā dihile kokoū be sibigiboū mei, bolonoū dalamoū duguo tagali.

2

Dige o sasaī kediamokoū midihō bolodo tefelenoū hehegieme

¹ Mogo diama, di Hiye O Yesu Kelesu, eme bolodo, di ta tawaga toboloū sagaī meido. Nī emokoū damaleyodei kahā degemoū, nige o sasaī fileba, ilo kelebe huboū, haba ilo kelebe huboū meiyode tawadama. Midihō bolodo tefelenoū hehegiema. ² Kenoū si nī koū kegeleye, huboū o ta yukuei bolodoboū, dobogoū sele igi gol makaboū de kaī kahā egei mosokoū folouba dugulo. Haba o ta, eme bi mei, yukuei kasagaī kainē ile folouba dugulo. ³ Nī kegei ke dugubabe, yukuei bolō kaī o kenoū mogo degeba timoū bolodo kokoū duwoyede toboū ma, haba o yukuei kasagaido kaī ke feleiba, name koū le hafeī degeda, ile ahu

dege duwoyede toboū babe, midihō kegei keme kasagaido. ⁴ Ni o boloū kedilie fileba, tabe hū mei, ha tabe huboū yode tawaibabe keme midihō kasagai. Kege fidama.

⁵ Ma mogodo diama, ni duma. Bi mei o sasai, sa sibige kuokoū huboū mei kediamē Godihā youmakoū damaleyodema, neledo dege dalaguale ke makai. Damaledo, Godihage yoū tagadi o sasaībe e sa bolodo kokoū fologouba, yoū woū ma dalaleyodema koū makai. ⁶ Kenoū si nime bi mei o sasaī kediamokoū sidifi nelē idi o sasai. Ni fimama. O koyo diage nimokoū hagī hiyedo nelemoū, haba ni toloū ya tā saikoū tefegile idiya? Biboū o sasaī kediā degele idi. ⁷ Ni hū bolodo, Kelesu sesedi hū. O koyo diage ni hū bolodo ke susuga toboloū idiya? Biboū o sasaī kediā degele idi.

⁸ Godibe di Hiye O, e tā hiye, kuguokoū nalaī tabe koū gue,

Nā nousie tagadi sagaī kenoū tefele, nogo diamokoū ne kegenoū tagayedei. *Wok Pris 19:18*

Nā kege degeibabe, name midihō bolodo miloloū dala kehe. ⁹ Nā o sasaī kediamokoū midihō bolofeī ke tefelenoū hehegie ho fogoū ba, ilo kediamokoū noū midihō bolodo hehegilingi, haba o ilo kediamē tobekoū mugubabe, midihō keme bolō mei. Godihā kuoloū tā kokoū husoūma tawalebe, nā midihō kasagaī miloloū be, kuoloū tā ke goboloū dade tawayedei. ¹⁰ O sasaī koyo nā kuoloū tā, Godihā Moseskoū neī ke oloū feī dulo seseligi, haba tā tanoū feī ta goboū babe, nā kuoloū tā oloū feido gobou kehe. Kuoloū tā oloū feī ke gobou kahā hebe kasagaī keme nā moloū. ¹¹ Di tewe, Godihā koū gue koū tobou,

Sasai hiyoubou, o hiyoubou hobou moumada. *Kisim Bek 20:14*

Haba tobou,

O hobou wodama.

Kisim Bek 20:13

Na sasai hiyou ta mou li meiyé, ha na o ta woumou tolo i debabe, name Godiha tabe bou gobou kehe. ¹² Godiha ta bolofei dimokou nei kaha degeimou, ni damaleyodebabe, hebe kasagai keme ta molou mei. Kegei degemou, tabou midihobou de kagei kagei ke ni tobou ma milou di debabe, niou tawaibou, kegeligi ta sale ke totou degele iye. ¹³ O sasai koyo na omokou solou do dege ho fogou babe, Godihane namokou solou do degele mei. Na omokou solou do degeibasi, ta saiye na ta tolou mei.

O tae Yesukou damaleyodema mou dalali, midihou bolou ke ta milou ho fogou babe, e damaleyodei keme sibige ta mei

¹⁴ Ma mogo diama, midihou bolou milou diyo mei o tae yousie eme Yesu Kelesukou damaleyodei oyode tobou babe, Godihage o kegei keme de mamolou? Ta molou meido. ¹⁵ Damaleyodei o ta yukuei kasagai kai debane, nale mei debane, haba damaleyodei sasai ta yukueibou nalebou mei debane, ¹⁶ ni kilege o tae o kegei kokou, na ile, kulio yukuei kaba, nale nama guokou dege bologuado dalayede kou tobolou ye, ha nalebou yukueibou be ta ne ho fogou babe, na ta ke tobolou kahage bi mei o keme de dogou gulo? Ta dogou gulo meido. ¹⁷ Nebe kenou tefei, na Yesu Kelesukou damaleyodema, midihou bolou ta milou ho fogou babe, na mou damaleyodei, sibige ta dala mei.

¹⁸ Kenou si, o ilo kelege kou gue tobolou, Yesu Kelesukou damaleyodema dalabe esofei. Midihou bolou milou

dibe esofeyode tobou babe, age sima kou gue tobolou, na damaleyodema dala ke kou tobolou ye, ha midihobolo ta milou ho fogou babe, age name damaleyodei odade tawale mei. Haba a midihobolo kenou milou basi, na duguo tawalebe, ame Yesu Kelesukou damaleyodei odade tawale. ¹⁹ Na Godibe tanou feiyode tawalemou damaleyodilibe kou bolo. Kenou si duo kasagai kediane Godibe tanou feiyode tawalemou kou damaleyodema gue degemou, dio kolo idi. ²⁰ Name totou degei o. Na Yesu Kelesukou damaleyodema dalalibe, midihobolo ta milou gadiyo mei kaha degemou, ne damaleyodei keme sibige ta mei. Na a tobolou kou tawalababe, na ma ta du. ²¹ Di kou guai o Abrahamhage e dihi Aisak wai sipsip бага wala doulukou silamou degeimou, Godiha emokou kou gue tobou, na ma ta ke dulo sesei kaha degemou, name doudo o.* ²² Kegei degemou di tewe, Abraham eme Godikou damaleyodema, e midihobolonou milou di. E taenou tobou li mei. E damaleyodei kahage sibige degei. ²³ Godiha kuguokou be kou gue nalai dala,

Abraham eme Godikou damaleyodei kaha degemou, Godihage eme doudo oyode tobou. *Stat 15:6*

Kegema, Godihage Abrahambe ma mogoyodei. Damaledo, Abrahamha e dihibe Godikou nei kaha, Godiha ta, kuguokou nalai dala keme damaledo kuhe tama degei. ²⁴ Mou youwa damaleyodeinou daladi obe Godiha dihile kokou be doudo o mei. Ha o ta, Godikou damaleyodema, midihobolo milou di keme Godihage doudo oyode

* 2:21 2:21 Stat 22:1-14

tobolou.

²⁵ Nebe kenou tefei, o hiyou degedi sasai Rahap ene Godiha e dihiile kokou sasai doudoyode tobou. Yobe, sasai Rahap e midihō bolō miloube, ege o bolou, Josuaha tobou mou haguasie felegoumou wolou dalali, dilie a taya ke boholou ma yamabeedei kaha degemou.* ²⁶ Di tewe, o e tou be fi dala mei, o keme tei dala. Nebe kenou tefei, mou youwa damaleyodema dala obe tei sagai dala. Yobe e damaleyodei kahage midihō bolō ta milou diyo mei kaha degemou.

3

Di mogoube bologuado dia dalame

¹ Ma mogo diama, ni o sudo tisa dabai* degelaba degedama. Yobe, Godiha di dabai degele idi ke figa dugulobe, tisa dabai degele idi kesi fileba, huyadefei kasagai ta dalababe, tisa dabai degele idi kediamokou be hebe kasagai hiyedo ke nele kaha degemou. ² Di olou feibe midihō bolō milou galamou kou degediye, kenou si mihikou fiyasigedi. Kegei degemou, o tae ta kasagai ta tobou diyo mei debabe, o keme bolodo, e tou ye midihō kasagai milouye domou yousie bologuado dia daladi. ³ Di howili dio ta wai hos kedia mogoudu muguomou, die mogoubou, die tou bou olou fei di doususu, di tagali sagai keleyanou suluguadi. ⁴ Mosolene ni fimama. Mosolebe hiyedo, mosole bala keme huyadefiido. Wi gofoudoye hagua, mosole tou mou be, mosole dia daladi o kaha bala

* 2:25 2:25 Josua 2:1-21 * 3:1 3:1 Tisa dabai koume Godiha ta hehegedi dabai.

huyadefeḯ kahanōu doususugumōu, sa e ile tagai kokōu idi. ⁵ Nebe kenōu tefei, di mogoube huyadefeḯye, kenōu si e yōusie hiye degedi.

Doube huyadefeḯdoye, dibi fafagai degei kokōu migimōu be e hiyedo degemōu, hebe olōu feḯ wobōu mōu idi keme di kōu tewe. ⁶ Di mogoube huyadefeḯ, di tōu be hiyendonōu. Kenōu si di mogoube dou sa degei, di tolōu mimigie suluguadi kenōu tefei. Dou gofōudo keme dou saḣa bi. Damalēdo, di mogouye degeiye, di midihō kasagai hiyedo milōu gōumōu, di fibōu tōu bōu olōu feḯbe sibigi degeimōu, ta kasagai kenōu tobolōu suluguadi. ⁷ Gali olōu feḯ, waibōu, siobōu, beibōu, to dulemōu galibōu olōu feḯbe o di mōumamōu dia daladi, diage di tagali sagai kenōu degele idi. ⁸ Kenōu si di mogoube diyōu bologuado ta dia dalale sagai mei. Mogou kahage yōu tagaiya kenōu tobōu di. Di ta kasagai tobolōu idi keme beiye galoumōu do gofōudo dugudi sagai kenōu tefei, di mogouya ke feḯedi. ⁹ Di Hiye O, eme di Aye, di mogouyege e hu hebele fogulo idi. Haba di mogou kahanōu be ta kasagaine tobolōu idi, o sasai, Godiha yōu sagai dege dalamabadomōu milou kediamokōu ne ta bōu basia tobolōu idi. ¹⁰ Di mogou kahage ta bolou kege tobolōu idi. Tabe Godiha hu hebele fogulo idi, haba tabe ta kasagai tobolōu idi. Ma mogo diama, midihō keme kasagaido, kege degedama. ¹¹ To sou dugebe, hueḯ bolofeḯbōu, hueḯ kasagaibōu de geleguo feḯdiyo mei. ¹² Ma mogo diama, hebe kiyouye kolo maḯibe, deḣe kolo de maḯi? Kegiyo meido. Haba hebe gohoye kolo maḯibe, hebe kiyou kolo de maḯi? Kegiyo meido. Nebe kenōu tefei, hueḯ kasagai feḯedi to sou

kodugebe huei bolō de fele? Kegebe ta degediyo meido.

O koyobe hebeniha tewebou debabe, ege midihō bolofei kenou milou ba dugulo

¹³ Ni kile o tanou tabe fimaihou tewebou bolodo ta de dala? O kegei ta dalababe, e yousie huyafei degeba, midihō bolodo kenou milou ba, di duguoba, eme tewe odade tawale ile. ¹⁴ Kenou si ni yogokou dafaba kona dege, niou ni hunou hebele fogulaba degeligne, niou sie tewe oyodedama. Kegeligi, ni ogou gai midihō kaha damaledo ta bolofei ke huyafei degeiye domou. ¹⁵ Tewe kegei keme hebenihale mei, sa sibige kuokou ge tama degei. O kegei kahage yousie fimadibe, eme Godiha ta seseliyade tawadiye, kenou si gulokou. Tewe keme Tamaha neli ke seseli. ¹⁶ Ni duma, yogokou kona dege dafama, diou die hunou hebele fogulo idi kedia sa kokou be, midihō kasagainou hiyedo milou gamou, bologua dalaguadiyo mei. ¹⁷ Hebeniha tewe keme o tae moumou be, e tewe keme ta sibigi degediyo mei, omokou ne hagi ta nediyi mei. O kahage amafei hemele fiyanou ta tobou di. Eme ta dudi o. Haba eme solou do degemou, midihō bolonou milou di o. O sasai olou fei kediamokou be midihō bolofei kenou milou di. E midihō bolō milolou yodemamou be, e damaledo milou di. ¹⁸ Di fi tanou dege daladibe keme hebe haimikou debe sogodi ke sagai. Sogoma fogou dalali, nale hou bologuado fua fologolu sagai kenou tefei, dine fi tanou dege dalabasi, midihō bolodo kenou hiyedo milou gouba dugulo.

4

Sa sibige kuokou midihō kasagainou tagale idi o kediamē Godibou ho mai dalagua

¹ Ni niou sie tae biyadibou gegadibou olou fei kaha yobe kei? Keme ni tou e tagadi kahanou ni duledu milou ga idi. ² Ni bi sudo kou molou sagai degele idiye, kenou si ta molou mei. Ni bi ta kona dege dalaguali, o woumou tofigieimou be, bi keme ni ta moudiyo mei. Ni tae gegamou, biyamou haguadiye, bi ni tagalemou biyolu keme ta moudiyo mei. Yobe, nige Godiha nimokou neyedema diho baga tobolou idiyo mei kaha degemou. ³ Haba ni bi ta molouyodema diho baga tobou mou be, ni ta moudiyo mei, ni fi doudo ke madiyo mei kaha degemou. Damaledo, bi ni tou e tagaliya kenou molouyodema diho baga tobou di kaha degeimou, Godiha nimokou ta nediyō mei. ⁴ Nime o hiyou degedi sasai ke sa degei. Sasai kegei kahage e ma tou fogou, midihō kasagai milou ga siadi. Nebe kenou tefei, nine Godi tou fogou mou, midihō kasagainou milou ga suluguadi. Duma, sa sibige kuokou midihō kasagai tagadi o keme Godibou ho mai dala. Damaledo, ni o taha sa sibige kuokou midihō kasagai milolou yodema milou babe, o keme Godiha mogo meido. ⁵ Godiha kuguokou kou gue nalai dala keme mou youwa nalai mei, di fi, Godiha di duledu mai keme Godiha kona degedi, e tagaliya kenou degedei.

⁶ Godiha dimokou hiyedo habaguguedi. Kegei kaha degemou, Godiha kuguokou be kou gue nalai dala,

O sasai diou die hu hebele fogulo idi kediamе Godiha degeiye, diame huyafei dege daladi. Kenou si o sasai diousie huyafei degele idi kediamе, Godiha habagugueibe diabou de daladi. *Gutpela Sindaun 3:34*

⁷ Kegei kaha degemou, ni Godiha hayedunou dalaguama. Ni Tama tobekou muguba, e kama folo. ⁸ Ni ile Godikou hafei dege dalababe, ene hagua nimokou hafei dege dalale. Midiho kasagai degedi o sasai diama, oe dobogou bigidi sagai kenou tefele, nine ni duo bigima. Fimai bolou o sasai diama, ni fimai be tanou fei Godikou nou fimama dalama. ⁹ Niou sie hagi degeba, niou ni sihou gosoma. Yilo idi o sasai diama, hobou yodama, gosoma. Hoho degedi o sasai diama, ni hobou hoho degedama, hagi dege dalama. ¹⁰ Ni Hiye Oha dihile kokou niou sie huyafei dege dalababe, Hiye Oha ni hebele fogulo.

Ni niou sie yogo tobe tobou ba tobou ba dedama

¹¹ Mogo diama, ni niou sie yogo tobe tobou ba tobou ba dedama. Damaleyodei o koyoha yogokou tobe tobolou ba figoubabe, o kegele kahage Godiha kuolou ta kene tobe tobolou ba figale. O koyoha Godiha ta ke fibabe, o keme Godiha kuolou ta dulo sesedi o mei. Godiha kuolou ta fidi obe e. ¹² Kuolou tabe Godihanou omokou nei. Enou be ta sai fidi o. Ege o sasai ilo kelebe you mamolouye dalamou dugulu, ha o ilo kelebe makoloye dalamou dugulu. Kenou si o ta na nogo fidi keme na degele sagai meido ke degedi.

Di Godiha ta dafadame

¹³ Sele dabai hiyedo degelamou degeli o diama, a nimokou tobou ladi. Yobe, ni diabaya, idibaya kele ya, sa hiyekou foloba, bi tiga mou di dabai ke hiyedo degele iligi, sadebe tanou ta mei degeiba kuhe fogou hagualeyode tobolou idi kaha. ¹⁴ Ta keme ni taenou tobolou idi. Idiba tama degele keme ni ta tewe mei. Sa sibige kuokou daladibe, nime mabiye migile goguo dalali, igilema folodi sagai kenou tefei. ¹⁵ Bolofeibe kou gue, ame Hiye Oha tagaiya ke tolo i ho fogou babe, a degeleyode tawai keme damaledo degeleyode tobou ma. ¹⁶ Kenou si ni niou sie hiye degemou, niou ni hu hebele fogulo idi. Midihou keme kasagai. ¹⁷ Kegei degemou, o sasai koyo na midihou bolo milou di keme kou teweye, ke haba milou ho fogou babe, name midihou kasagai degeli.

5

Bi sudo o sasai kediamé gili degeibabe, hebe kasagai molou

¹ A bibou o sasai nimokou tobou ladi. Nime hagi hiyedo dugulo dala kaha degemou, kou bou ge hiligedo gosolo dalama. ² Ni bimai olou fei tabale i. Ni yukuei olou fei sigoye nala hobogou. ³ Ni sele igi golbou, silvabou olou fei keme asa guaye tou sagai kegei dalamou dugulu keme ni midihou kasagai olou feibe tama degeimou dugulu kehe. Asa gua kaha sele nadi sagai kenou tefele, ni tou ne olou fei douye nale. Yobe, uwage sawisieibe hafei degeli kou lege, nige bi sudo kefema gili degele ili kaha degemou. ⁴ Ni defeido duma. Ni dabai degele idi o kedia ni hebe haikou ya, segei mouma haguasieimou be, nige sele kou neleyodele idi keme nele idiyo mei kaha degemou, dia

hagi hiyedo degele i. Hagi hiyedo degemou hagnosisoumou be, Hiye O Godi, e nelebe hiyedo folodo, ege o kedia hagnosisolu uwobe kou dudi. ⁵ Nime sa sibige kuokou bi bolu ke hiyedo dege kefema bologuado dalagua. Nalene hiyedo nalamou hagnosisiligi, ni tou dalale ili kaha, ise, ni wolo sawisie i keme hafei degeli. ⁶ Bibou o nige doudu o sasai, nimokou ta degele ili mei kediamme ta saiye tolou ba woma mei degele.

Di neledu dege dalali, Godikou diho бага tobolou ba, Hiye Oha haguale ke dia dalaguame

(Ta Hiye 5:7-20)

Di hagi duguoba, neledu dege dalali, Hiye Oha haguale ke dia dalaguame

⁷ Mogo diama, Hiye Oha haguale ke dia dalagualibe, hobou dafadama. Ni tewe, hebe hai dabai degedi o kediage die nale segei kaha suwi degele ke dia dalalebe ta dafa idiyo mei. Hueibou asobou kaha degeiye, segei sibige degele ke dia dalaguadi. ⁸ Nebe kenou tefei, nine dafadama. Neledu dege dalama, Hiye Oha haguale hafei degeli kaha degemou.

⁹ Mogo diama, ni niou sie yogokou gofou degeiba gofou degeiba deba, tobe tobou dama, ta sai fidi Hiye O Godi eme hafei degei dala kaha degemou, ni degeli ke duguoba fiye domou. ¹⁰ Mogo diama, ni habage-degele-duguo-tobou di-o kediamokou fimama. O kedia Hiye Oha huya kenou hehegile i kelegebe, hagi hiyedo dia dugulo i. Kenou si dia dafa ili mei, neledu dege deleigui. Nine dia degei

sagai kenou tefema. ¹¹ Duma, di kou gue tobolou idi, o koyoha hagi hiyedo dugumou hagueiye, e ta dafadiyo mei, neledo dege daladi, o kegei keme hoho dege. O Jop e hagi dugu kaha ta kou ni kou dulo i.* E hagi hiyedo dugumou, neledo dege dalali, ta dafali mei. Godiha olou fei bologuoumou bolodegei. Damaledo, Hiye O eme solou do degedi, dimokou habaguedi o.

Hebeniha huya kebou, sa sibige huya kebou de ta maka dege tobou dama

¹² Ma mogo diama, ni defeido duma. Hebeniha huya kebou, sa sibige huya kebou, hu daga taya kebou de ta maka dege tobou dama. Na ta degeleyodebabe, damaledo dege. Na ta degele mei keme hobou tobou da. Hu daga daga taya maka dege tobou dama, ni ta saiye touye domou.

Damaleyodei oe Godikou diho baga tobolou be nele hiyedo

¹³ Ni kilege o tanou tae hagi dugubabe, Godikou diho baga tobou yede. Ha, ni kile o tanou tae hoho degeibane, Godiha hu hebele foguoba die feyede. ¹⁴ Ni o ta do degeibabe, sosikou widio o kedia haguayede tobou ba, dia ya fologa, Hiye Oha huya ke diho baga tobolou gi, do o kaha tou guebou gusege huei ke hulo. ¹⁵ Godiha dabai degedi o kedia damaleyodema, diho baga tobou babe, Hiye Oha do o ke bologuouba bolodegele. Midiho kasagai, do o kaha milou gadi kene Hiye Oha gebe meiyodele. ¹⁶ Kegei degemou, ni midiho kasagai degei ke niou sie yogokou kusigile tobou ba tobou ba dema. Haba niou siene Godiha ni bologuouba bolodegedema diho baga tobou ba tobou

* 5:11 5:11 Jop 1:21-22; 2:10; 42:10

ba dema. Damaleyodei o taha Godikou diho baga tobolou be nele hiyedo. Nele kahage do o keme dogou guba toto bolo degele. ¹⁷ O Elaija* eme di sa degei dalali, huei todayedema Godikou hiyedo diho baga tobou mou, huei teli mei deleibe, sadebe olou fei kamadia, oguone olou fei walaiyosi kege mei degei. ¹⁸ Elajaha haba diho baga tobou mou, huei toumou, hebe hai saya nale segei olou fei haba fologamou suwi degele i.

O mihikou fiyei keme di dogou guoba bohoulou mala haguame

¹⁹ Ma mogo diama, ni o tanou taha damaledo ta ke dulo seseligi tou fogou, mou duwoba, e mogo tae haba bohoulou ma mala hagubabe, ²⁰ o keme dabai bolodo degeli. Ni kou tawama, o taha ile, midihou kasagai milou di o ke Godikou mala hagubabe, ta tolo ile mei. Kefei degeli kahanou be, Godihage o kaha midihou kasagai milou di kaha hebe kasagai kebou de olou fei igile mugulu.

* 5:17 5:17 1 King 17:1; 18:1, 42-45

Godihā Tā Bolofei

Konai: Godihā Tā Bolofei New Testament

Nupela Testamen long tokples Konai long Niugini

copyright © 2014 Wycliffe Bible Translators, Inc.

Language: (Konai)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 28 May 2022

8c47cab8-fc6e-524e-936f-c52eba70db94